

**Nzryr-krbz Pol Kx Ayrnrngr
Mz Lr Tesalonika
Natq Ngr Nzaplxtqngr Mz
Nzryr-krbz Pol Kx Ayrnrngr
Mz Lr Tesalonika**

Letz lc yrbz aposol Pol mz dzbe lrmakxtr kcng taon kxetu Tesalonika mz provins kc Masedonia. Mzbq ka Masedonia nzrpipebz kandre kc Gris. Oklatile nidr mz nzvzpx-krde krali x yapwxtipxbzle Nrpakxmrlz badr. Kxtrngiulrjiu kxnzkqlung x kzdung lr Jiu nzlxnngitilr Jiszs mzli lc. ☆ A' kzdung lr Jiu kxtrnzrlxnngitiung nzngyati drtwrdr nide x nzbatrpzlr kzdq nzotablrng kxetu. Delc kxnzrlxnngiting tzatwzlrpx-ngrdr Pol badr Timoti x Saelas mz taon kc Berea. Zbz Pol atwzlr-mopwzle Timoti x Saelas mz nzalvztr-krdr lr Tesalonika. Mz nibr kzdung mzli, Pol yrle letz lc mz nzayzlu-krbzle kzdung da kx rlwa-ngrbz Timoti bade.

Yrle letz lc mz mzlir yiz 50—51 AD mz nibr nzrmcngnr mz Jiszs, mzli kc tqmnc-ngrde Korint. Mwx krlc buk ayrnrngr kx nzyr mz Nzryrngrkxtr Kc Ate.

Mrkeng Mz Letz Lc

Pol abrtzlvzle nqm q kr lr Tesalonika. [*dckrlzde*
1]

Pol ayzlubzle natq kxnzpibqti-ngrdr nqm q krde. [*2:1-16*]

☆ : Aposol 17:1-15

Nike troklati-mou-ngrdeu nidr x nike tqatwzlr-ngrbzle Timoti badr. [2:17—3:13]

Kxnamu nzmnc-zpwx-krdr badr Gct x kzt-edrng. [4:1-12]

Pol ayzlubzle natqdr mz kxnzrlxngiting kcng tzbzpeng x mzli kc nayzlu-mou-ngrm Jiszs. [4:13—5:11]

Alvztr-kzle nidr kxnamu nzmnc-zpwx-lxblr-krdr. [5:12-28]

¹ Ninge Pol, nigr ncdr Saelas x Timoti. Ryrbzkr bamu, nimu leplz neng Gct Trte x Kxetu rgu Jiszs Kxnzmcp, kcng tzmncng taon Tesalonika.

Krka'-ngrgr kx Gct naokatrle nimu mz zmrlz ngrde kxmyalz x namnc-zpwxamu.

Nqm q Kr Lr Tesalonika

²⁻³ Mzli kx krka'-ngrbzkr mz Trtegu Gct, awizvz-ngrbzkr bade nimu amrlx. Murde aelwapx-ngrnamu nzrlxngiti-krmu mz nzwztr-krbzmu bade. X aelwapx-ngrnamu nivz lrmu mz nzokatr-krmu leplz. X aelwapx-kz-ngrnamu nzobqtipx-krmu nyzylu-krm Kxetu rgu Jiszs Kxnzmcp. Mz nztu-amqngi-zvz-krmu mz mzli r nzatrkatigr.

⁴ Gct mrlztile nimu. X krlzkr kx mcp,le nimu mz nznngini-krmu leplz nedeng.

⁵ Murde mzli kc lemgr bamu Nrpa ngr Jiszs Kxnzmcp, trpi-txpwzkru mz natq. A' aelwapx-kz-ngrgr mz zmatq, mz nzokatrkr Mqngkxtr, x mz nzrlxngiti-angidrgr. X krlz-kzamu kx aelwapx-ngrgr Nrpakxmrlz lc mz nzmnc-krgr, mzli kc tqmnc-ngrbzkr bamu. Da kcng amrlx tqalebzkr bamu, ngi dalr nzokatrngr nimu.

⁶ X nigr badr Kxetu kx ngibz lrpzki bamu kx navz-nqblqamu. Kxmule-esz' sc tzatrkatimu, a' sc tqlxngitiamu Nrpakxmrlz mz nzabrtzngr kx vzpxm mz Mqngkrxtr.

⁷ Mz nzmukrde lcde, nangingbzm lrpzki mz leplz neng Kraes mz provins kcng Masedonia x Akaia.

⁸ Murde nzaetunepx-krmu Nrpa ngr Kxetu Jiszs Kxnmcp x trngi-tpwzu Masedonia x Akaia, a' nrpa ngr nzrlxngiti-krmu nzkrzpe mrlcng kqlu. Dekc, trpnzng da kx napitr-mopwzkr mz nzrlxngiti-krmu.

⁹ Lr mztea lcng tzyapwxtipelr nzmrlzkr nqm q krmu mz nzabrtzlvz-krmu nigr. Se tzyapwxtine nzesakikr nzangio-krmu mqngr drka' kxnzlvz, kx trpnzng nzlu-krdr. X tekqtrpeamu nqm q krmu mz nzwztr-nrbalq-krbzmu mz Yawe Gct angidr kc tq lu alo.

¹⁰ X aenzliamu nzvzo-krm Mrlxde Heven, kc tqatulzmle mz nzbz-krde. Krlc Jiszs kc tqarlapxbzle nigu mz zngya ngr drtwr Gct kc navzm mzli kc napixngr neke tubq x neke vz-rbr.

2

Nzwzkr Pol Tesalonika

¹ Mzlegrng x inwegrng, krlzpeamu kx nzvz-krbzkr bamu ngi da kx nrade ycbz.

² Mzli kc trvzka-ngrpgr bamu, drtqgr etqtx x nzamyatibz mztea Filipae. Nzmusr-krdr lc nigr krlzamu. Kxmule-esz' nzxplrmimlr bagr nzrpwa'-krdr nzwz-krgr, a' Gct rgr abrmle nelzgr mz nzipix-krbzkr Nrpakxmrlz bamu.

³ Dekc, tqkrlz-ngrnamu kx nzrpipx-krgr Nrpakxmrlz trvzpxpuu mz drtwr ngr nzpokianger, drtwr kxtrka, x mz drtwr ngr nzesabrtingr.

⁴ A' pipxkr murde Gct kc tqabzpx-kaile nigr x aprc-atemle nzwzngr lc bagr. Trsutiu drtwrgr leplz nzabrtzlvz-krdr nigr, a' sutitx drtwrgr Gct kc tqobqplxle nabzgr nzabrtzlvz-krde nigr.

⁵ X krlz-zpwxamu kx trtamitikru nimu mz nzymne-krgr x tresabrtikru nimu mz nztwz-krgr trau scmu. Krlz Gct kx da lc da zpwx.

⁶ X trsutiu drtwrgr kx naglqlzamu nigr o naglqlz kzdung kz leplz nigr. Kxmule-esz' nigr aposol neng Kraes, x takitrde nzokatr-krmu nigr x nzamatq-krmu nigr, a' trwaipwzkru lc bamu.

⁷ A' mzli kc tqmnc-ngrgu, mnc-nrwxbzkr apubzkr bamu lxe doa, kc tqaclvele itoto nede.

⁸ Abrtzlvz-ngrgr nzrpipx-ngrbz bamu Nrpa ngr Gct murde aodukr nimu. X abrtz-kzkr nzka-lzbq-krbzkr bamu murde pqtr zlwz mz drtwrgr nimu.

⁹ Mzlegrng x inwegrng, krlzx kx sc tqdcpxbe mz drtwrmu kxmu nzwz-kato-krgr. Mzli lc tqyapwxtipx-ngrbzkr Nrpakxmrlz bamu, wzkr mz nrlckxbq x ngrlx mz nzatatr-krmgr trau, murde ma tqaetunepxkr nzwz-krmu.

¹⁰ Mzli kc tqmnc-ngrgu, krlz-zpwxamu kx nzmnc-krgr tr x tubq, x trpnzngr da kx trkatr elr. X krlz Gct kx krlc da angidr.

¹¹ Krlz-kzamu kx apusr-ngrgr nimu doa negrng.

¹² Axplrkr nimu, apqtrpzkr drtwrmu, x pibzkr bamu kx nzmnc-krmu natubq, murde natakitrde Gct kc tqkqlele nimu mz nzmnc-lz-krbzmu bade x mz nzprtr-krmu mz nzmyalz-krde.

¹³ X awi-zvzbzkr mz Gct. Murde mzli kc lemgr bamu Nrpa ngr Kraes, xlramu x lxngitiamu. X lxngiti-kzamu kx nrpa lc tqngi natq Gct angidr, trngiu natq ncblo. X me tutr-ngrde lape! X natq Gct lc tqatutrlc nzwz-krde mz nabzmu, nimu kcng tzbtrtipe drtwrmu Jiszs.

¹⁴ Mzlegrng x inwegrng, prtramu mz nzatrkati- ingr kcpwz tzprtrng lr Jiu kcng tzlxngitilr Mevalu Jiszs, tzmncng mz Judiz Provins. Murde lr mrnyzdr nzatrkati- nidr, da kc tzwaisr- ngrdr lr mrnyzmu nzatrkati-krdr nimu.

¹⁵ Lr Jiu lcng, melrmqdrng nznibq-kailr profet. X mz nibrdr, trtedrng nznibq-kzlr Kxetu rgu Jiszs Kxnmcp. X mzli ka, sc tzmazlrpe- kzngrdr nigr. Gct trabrtzlvzleu lr Jiu lcng, murde nzpxtpx- ngrdr leplz amrlx,

¹⁶ mz nzrpwa'-krmlr bagr nzle-krbzkr nrpa ngr nzarlaxngr mz kxtrngiulrJiu. Mz nzm-krde lcde, tzrtzlvzlvz-zvzpelr alwx ngrdr. A' mzli ka zngya ngr drtwr Gct ycpe pipz nzkrz-krbzle nidr.

Suti Drtwr Pol Naoklati-mouleng

¹⁷ Mzlegrng x inwegrng, mzli kc tqmncitix- trpemgr mzli mrbcnepwz mz nrkrdrdq, sutitx zlvz drtwrgr nzoklati-kr-mopwzkr nimu, a' sc tqrbxlm bagr. Kxmule-esz', a' krlzku kx mz drtwrgr nigu kc tqmncu.

¹⁸ Sutitx zlvz drtwrgr nyzlvz-krbzkr bamu. X ninge, Pol, abz- ngrnele nzwz-krbzkr, a' Setzn tqrpwa'-ngrde nzwz-krbzkr.

¹⁹ Suti drtwrgr nzoklati-mou-krmgr nimu murde obqtipxkr nzmc-krgr nztu-amqngi-krmu

mz nzrlxngitingr. Mz nzmukrde lcde, sa nanginimu kx nabatrpzle nzaelalz-krm drtwrgr! X sa na-apuamu da kxmrlz kx natwzkr mz nzwz-krgr. X sa naglqpx-lzbq-ngrgr nimu mzli kc natu-lxblr-ngrbzku mz mz Jiszs Kxnmcpz mzli kc nayzlu-mou-ngrmle!

²⁰ Da zpwxtx! Nimu kx nabatrpzle nzelalz-krm drtwrgr x nimu kx nzglqzngr nigr.

3

¹ Mzli kc tqrblytxpe nzaenzli-krgr x tqxngitr-zlwzkr nzmnc-rlru-krmamu bagr, sc tqao tipe drtwrgr kx nigr badr Saelas namnc-tpwzkr taon kc etu Atens,

²⁻³ x na-atwzlr-ngrbzkr Timoti bamu. Nide mzlegr kx wzkr badr mz nzwztr-krbzkr Gct. Oka-trle nigr mz nzyapwxtipx-krbzle Nrpa ngr Kraes. X atwzlr-ngrbzkr nide murde na-axplrle nimu x na-apqtrpzle nabzmu. Murde ma nzrlxngitikrmu tqrnrc mz nzkxpungr kcng tqprtzmqng bamu mzli ka. Murde krlzpeamu kx da kxmule lcng naprtzmqng bagu.

⁴ Murde pi-pnzbzkr ena bamu mzli kc tqmnc-nrgu, kx leplz sa na-atrkatilr nimu kalr. X mzli ka da kc tqpi-ngrbzkrle sc tqtutrpe.

⁵ Mz nzmukrde lcde, mzli ka rbltxpe nzaenzli-krgr, delc tqatwzlrpe-kai-ngrbo Timoti bamu, murde nakrlzx kxmupe nzrlxngitikrmu. X mwxlrlvzx nimu murde ma tqataole nimu Setzn, x nzwz-krgr sc tqngipe brmrda.

⁶ A' mzli ka Timoti yzlupe-mop bagr x lemle bagr nrpa ngr nzrlxngitikrmu x nivz lrmu. Pimle bagr kx dcpz zvz mz drtwrmu nigr x sutitx

zlwz drtwrmu nzmc-krmu nigr, da kc tqwai-kzkr nzsutikr drtwrgr nzmc-krgr nimu.

⁷ Mz nzmu-krde lcde, kxmule-esz' nzatrkatilr nigr mz da kxkqlu, a' apqtrle drtwrgr nzxlr-krgr nrpa ngr nzrlxngiti-krmu.

⁸ X mnc-zpwxpekr mz nzxlr-krgr nzlolvz-amqngi-krmu Kxetu rgu.

⁹ X rblxm bagr nzipix-krgr natq ngr nzawi-krbzkr mz Gct mz nzetukr nzabrtzlvz-krgr nimu.

¹⁰ X nzkrka'-krgr pq zvz, ngrlx x nrlckxbq. Krka'-ngrgr kx namc-moukr nimu x na-alvztr-ngrbzkr bamu da amrlx kcng tqmrbrpxm mz nzrkrz-krmu nzrlxngiti-krgr.

¹¹ Krka'ngr mz nzrpi-krgr kx,

“Gct Trtegr x Kxetu rgr Jiszs, rlxtibzkr bamu naoliqtipxbzmu lrpzki kc nakrlz-ngrbzkr lr Tesalonika.

¹² X krka'-kz-ngrgr kx na-aetunepxbzmu nivz lrdz mz nzmrlzti-lzbq-krdr x nzmrlzti-krdr leplz amrlx, x namrlztilr leplz da kc tqwai nzmrlzti-krgr nidr.

¹³ Trte, axplr nabzdr, murde natrng x natubqng mz nzobq-krm, myapxbz mzli kc Kxetu rgr Jiszs nayzlu-ngrmlr badr leplz kxnztr nedeng. Eu. Angida!”

4

Nzmncongr Kx Abrtzlvz Gct

¹ Mzlegrng x inwegrng, alvztrpekr nimu mz nzmncngr kxtubq, murde na-aelalz-ngrm drtwr Gct, x sc tqvz-nqblqpeamu. X mzli ka rngidrtx-zlwz-ngrbzkr bamu mz zmatq ngr Kxetu rgu

Jiszs, kx nzmnc-krmu lc tqtubq navz zvz x naetunepx.

² Krlzpeamu nike pibzkr bamu, mz zmatq ngr Kxetu rgu Jiszs.

³ Me pnz drtwr Gct nide sele: Nzmnc-krmu natramu, x nayrlqpx-lzbqamu mz alwx ngr nzrmwimi-krmu doa kxtrngiu krnalzmu.

⁴ Suti drtwrde kx doa kxes' mz nimu nakrlzle nzaclve-krde nrkrdrdqde mz nzmncngr kxtr x kxtubq.

⁵ Leplz kcnq trnzkrzlru Gct nzrlrpx-ngrdr nrkrdrdqdr nzmailz-krdr nidr mz alwx ngr nzrmwimingr doa kxtrngiu krnalzdr. A' bzkq apuamu nidr.

⁶ X bzkq angqngutiamu kztemu mz da lc. Murde Gct sa na-ayrplapx-zlwzle leplz kx nzrtrngztibzlr da lcnq. Dekc tqpi-ngrbzkrlle ena bamu mz natq kxlqlwx.

⁷ Gct kqlele nigu murde nzmnc-krqu natr. X trsutiu drtwrde nzrtrngzti-krbzku alwx ngr nzrmwimingr kxtrngiu krnalzgu.

⁸ Mz nzm-karde lcde, mrlx kx pxtxpx-ngrde nzalvztrngr lc, pxtxpx-kz-ngrde Gct, kc tqrkam bagu Mqngrkxtr.

⁹ Tryrpwzkru kxnamu nzmrlzti-krmu kztemung mz Kraes, murde opx angidr kx Gct alvztrpe-ngrde nimu da lc.

¹⁰ Murde mrlztiamu leplz neng Kraes mz mztea amrlx mrkc Masedonia Provins. A' mzli ka, rngidrtr-ngrbzkrl bamu kx nzmrlzti-krmu nidr naetunepx zvz.

¹¹ Rtrngztibzmu da kc tqbatrpszle nzmnc-krmu mz nrw. Bzkq pnz drtwrmu dztu leplz, a'

dztumu. X aleamu nzwz-krmu esz'-krmu. Pimpnbzkr bamu ena nzale-krmu da lcng.

¹² Murde mz nzmnc-krmu lc tqmrlz, leplz kcng trnzlxngitilru Kraes na-amatqlr nimu x ma tqmnc-xgleamu doa kc-kzng.

Nyzylu-krm Kxetu Rgu

¹³ Suti drtwrgr nakrlzamu nike naprtzbz mz leplz neng Kraes kcng tzbzpeng. Murde trsutiu drtwrgr nzmnc-krmu mz drtwr kvz mz nzapukrmu leplz kx trpnzng da kx nzobqtipxlr.

¹⁴ Lxngitiku kx Jiszs bz x tulz mou. Mz nzmukrde lcde, Gct sa na-atulz-kzple krkcng tzbzpeng tzlxngitilr Jiszs, murde navzmimle nidr, mzli kc nayzlu-ngrmle.

¹⁵ Nzalvztrkr Kxetu nide sele. Nigu kcng tzlubeng mzli kc nayzlu-ngrm Kxetu rgu, trnartwayzpwzkuu mz krkcng tzbzpeng, mz nzvzdzngrbz mz nzmctingr nide.

¹⁶ Murde mzli kc Kxetu rgu navzom Heven, lr nrlc sa naxlrlr dq nzkabongr, natq narenjrl, x trpu r nzkqkr Gct. X leplz neng Kraes kx nzbzpeng natulz-kaipqng.

¹⁷ X mz nibrde, nigu kcng tzlubeng x kxnzlu-moung sa navzdz-lxblrku mz nabz dcbz, mz nzyrlwrpx-lxblr-krgu badr Kxetu mrlc mzlilxlr. X sa namnc-lxblr-aloku badr Kxetu! ✧

¹⁸ Mz nzmukrde lcde, apqtr-etramu nabzmu mz nzipx-krmu natq lcng.

5

Naoliqti-zvzku Nyzylu-krm Kxetu

¹ Mzlegrng, mzli ka trnayrpwzkru bamu mz mzli kc na-adcpx-lzbq-ngrm Kxetu rgu o zbq kc nayzlu-ngrmle.

² Murde krlzpeamu kx mzli lc nakctipx, na-apule ncblo kc tqpn da mz nrlckxbq.

³ Leplz kx trnzrlxngitiung narpilr kx, "Nigr ka tqmnc-zpwxpekr ye mz nrw." A' mzli lcde, nzayrplapxngr nidr sa na-ani txpwz, na-apule nimz ngr zvetqkr nibr olvz kx narmika. X sa narblxbz mz leplz lcng nzrlapx-krdr mz nzlva-krdr.

⁴ A' trnakctipxwamuu nzvz-krm Mzli lc Tq-matq, mz nzapu-krde nzvz-krm ncblo kc tqpn da. Murde trvz-nqblqpwamuu nqmq ngr alwx.

⁵ A' nimu doa neng Kraes kcng tqvz-nqblqamu nzalvztrngr angidrng x aleamu da kxtubq. A' tralepekuu da kx amyale drtq kcng tqyc-kapq.

⁶ Bzkq apuku kxtrnzrlxngitiung. Murde alwx ngrdrng nzakamrbr-ngrdr da mz nabzdr x nza-pulr leplz kx nzmwing, murde trnzkrzlru drtwr ngr da kx prtilzmqng mzli ka mz nrlc. Mz nzm-krde lcde, na-aclvetio-lzbqku x nalolvzo-lzbqku.

⁷ Murde nrlckxbq mzli r alwx, mzli r nzmwingr, x mzli r nzrmnqngr.

⁸ Mz nzvz-nqblq-krngu nzalvztrngr angidr, na-aclvetio-lzbqku. Na-apuku ncblo ngr vea mz nzvec-krngu badr Setzn. Nzrlxngiti-krngu x nivz lrgu na-ayrbqpxle nabzgu na-apule temz ngr lomrgu kc tqyrputrngr nipna. X nzarlapxkr Kraes nigu na-ayrbqpxle drtwrgu na-apule da kxmngi kx nalalvzle nar ncblo ngr vea, murde mz drtwrgu kxbr, obqtipxku da amrlx kx vzpxm mz nzarlapx-krde nigu.

⁹ X nadcpx mz drtwrgu kx Gct mcpyle nigu x arlapxpele nigu mz nzbzkr Kxetu rgu Jiszs Kxnzmcpx. A' trmcpyleu nigu mz nzayrplapx-alo-krde nigu.

¹⁰ Kxmule-esz' bzpeku o lubeku mzli kc nayzlu-ngrm Jiszs, a' bz-ngrde murde nalu-zvzku badr.

¹¹ Mz nzmu-krde lcde, apqtramu drtwrmu x axplr-lzbqamu da kc tqwaiamu mzli ka.

Natq Ngr Nzarl-lzbqngr

¹² Mzli ka, mzlegrng x inwegrng, na-amatqamu krkcng twz-katong mz mzlirmu, mz nzaclve-krdr nimu mz zmatq ngr Kxetu x mz nzalvztr-krdr nimu.

¹³ Mz nivz angidr, aelwa-ngrbzmu badr kx amatqamu nidr mz nzwzng krkcng tzalebzlr bamu. X mnc-zpwx-lxblramu.

¹⁴ Mzlegrng x inwegrng, lalztqmamu bagr. Axplrbzmu natqmu mz krkcng drtqdr tqsa. Apqtrpzmu drtwr krkcng tzmwxlrng. Okatramu krkcng nabzdr tqbao mz nzlngiti-krdr. X mnc-zpwxamu badr leplz amrlx.

¹⁵ Aclvetio-lzbqamu x bzkq ayzclubzmu da kx-trka mz da kxtrka. A' na-alebzmu da kxmrlz mz kztemung x leplz amrlx.

¹⁶ Naelal-zvz-ngrm drtwrmu!

¹⁷ Nakrka'-zvzamu!

¹⁸ Kxmule-esz' nike prtz, a' na-awi-zvz-ngrbzmu mz Gct da lc. Murde suti drtwrde kx doa amrlx krkcng tzlngitilr Jiszs na-awi-zvzbzng bade.

¹⁹ Bzkq rpwa'-ngrnamu nzwzkr Mqngrkxtr.

²⁰ Bzkq apusr-ngrnamu natq x nrpa kc tqaelwapx-ngrbz Mqngrkxtr mz leplz brmrda.

²¹ A' mzli kc tqrpinger kzdq ncblo kx natqde aelwa-ngrbz Mqngrkxtr, naobqtitr-kaiamu da amrlx. X yrlq-zvzamu natq kxmrlz.

²² A' yrlqpx-lzbqamu mz natq kxtrka amrlx.

²³ Nzkrka'-krgr nimu nide sele:

“Gct, nim kc tqrkam bagr nzmnc-zpwxngr. Krka'-ngrgr kx na-atrq nidr mz da amrlx. Murde nztubq-krdr mz mqngrdr, nabzdr, x nrkrdrtdr navz nakrlzbzle nyzylu-krm Kxetu rgr Jiszs Kxnzmcpx.

²⁴ Nim kc tqkqlepele nidr. X lxngitigr kx sa natutrq natqmng amrlx. Eu. Angida!”

²⁵ Mzlegrng x inwegrng, nakrka'-kz-ngrnamu nigr.

²⁶ Pibz “Nimu la,” mz inwegung x mzlegung amrlx mrla, mz nzmale-lxblr-krmu mqmu mz nivz.

²⁷ Rngidrtx-zlwz-ngrbo bamu mz zmatq ngr Kxetu, kx natqgr lcng narlwxbz mz leplz neng Kraes amrlx.

²⁸ Krka'-ngrgr kx Kxetu rgu Jiszs Kxnzmcpx naokatrle nimu mz zmrlz ngrde kxmyalz.

Delape. Ninge *Pol*,
nigr ncdr *Saelas* x *Timoti*.

Nzryrngrkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 28 Dec 2024 from source files dated 31 Aug 2023

fb2b7f06-e254-5fb7-b59d-ee21d5d7a93f